



**Inatsisartut Ombudsmandiata 2018-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.**

(Inatsisinut ataatsimiititaliaq)

(Siullermeerneqarnera aappassaaneerneqarneralu)

Demokraatit nuannaarutigaat Ombudsmandip sulisunik nutaanik Kalaallit Nunaanni qanoq inuuniarneq sulinerlu ittuuneranik nassuiaasarneq piffissatornarlunilu isumalluutinillu atuisuusarnera akuerimmagu – sualummik tikisitat aaqqissuunneqarnitsinnik ilisarisisaqaqanngitsunik nassuiaassisarnerni.

Nunatsinni branchenut tamanut unammilligassaasunik ilisarinninnermik akisuatitsitsinera erseqqissarneqarmat nuannaarpugut. Tamannami inunnik isumaginninnermi ilaalu ilanngullugit malittarisani naliginnaasuni aalajagersarneqarsimasunit sullissineq sivisunerusinnaasarneranut peqqutaavoq. Utoqqatsissutaassanngilarli. Killormulli sulisorineqartut tunngavigalugit najoqqutassanut ingerlatseriaasinullu atuuttunut naleqqussarnermi ilisimasat pisariaqarput, taamaalilluni innuttat isiginneriaasiat ilimagisaallu tunngavigalugit sullissisunit pineqartunit aamma paaseqatigiinnerunissaq angorusullugu naleqqussarneqarsinnaanngussapput.

Isertuunneqarsinnaanngilaq Ombudsmandip ukioq manna utimut pissutsit takunngitsoorneqarsinnaanngitsut isornartorsiormagit. Naammagittaalliutit innuttat pisinnaatitaaffimminik ilisimasaat annertusisimaneratigut tunngaveqarsinnaapput, aammaattaarlu Ombudsmandip qanittumi naammagittaalliornissamut videoliaa nutaaq peqqutaasinnaavoq. Tamanna qutsavigisinnaavarput tusaatissatullu tigullugu, taamaalillunimi Ombudsmandip takussaana, ammasuunera, atorfiannullu paasisimasat matumuuna video aqutigalugu annertusineqarsimapput.

Tulliullugu naammagittaalliutit imarisai sammissavagut, naammagittaaliutillu immini iluatsinngitsoornertut isigisariaqarpagut. Ingerlatsinikkummi ileqqorissaarnissaq tassaasuaannassaaq anguniagarput. Paasisariaqarparpullu Ombudsmandip oqaaseqaataani allaqqasutut nutaanik sulisortaarnerup tungaatigut unammilligassat inuiaqatigiinnut annertuumik sunniuteqartarmata, inatsisitigullu atorfitsinermi sullissinerup pitsaassusaata atajuarneranut sunniuteqartarluni. Tassaavoq ajortoq innuttatta ukiorpassuarni atugassarititaasimasoq, tamannalu naammaginangilluinnarpoq.

Taamaamallu pisortat ingerlatsiviini sulisut tamaviisa tunniuttagaanut nersortariaqarpagut, aamma politikikkut sinaakkutissanik torrannerusunik eqaannerusunillu pilersitsisariaqarpugut, periaatsinillu pisariunnginnernik pilersitsisariaqarluta, taamaalillutalu sullissinermi kukkunerit pinaveersaarlugit.



Taamatut oqaaseqarluta Ombudsmandip nalunaarutaata tusaatissatut tiguarput, ilisimasallu pigilikkagut siumut atorluarnissaat kajumissaarutigaarput.